

# FRIISK TISING

Lasmootebles foon e Friisk Foriining – 1/2014

www.friiske.de, telefoon: 04671-6024154, iimail: info@friiske.de

## Üusen iirsberucht 2013/2014

. . . forläid aw e lasmootefersoomling foon e Foriining, di 10. april 2014 önj Risem.



Da scheewe önj e krouf wjarn e gödj beseet

- Bai üüs lasmoot foon Frisia Historica begant et iir åltens ma en noopemårket trinam jare hüüse önj e Hüneblinger Kuuch.
- Di 29.4. häin we en draåwen ma Hape Müller än Joachim Wussow foon Antenne Sylt, weer et am "frasch önjt raadio" gäng.
- Foon e 2. moi ouf wus önj Flansborj önj e dånsh biblioteek en ütstaling ouer Jens Mungard sin laawen: "Ströntistel en Dünemruusen". Lars Harms heet ouert ferhüülj foon dånshen än frasche eefter e 2. wråålskrich snååked, foon Kalle Johannsen köm di musikaalische baidreeging.
- Fort treed tooch büütj e Friisk Foriining wi en spånktuur trinam hamelfård önj. Dåt tooch gäng et wi långs e weestlike stiirewäi foon e dånsh gråns bit eefter Hüsem.
- Sunt e 10. moi as üüs tweed forwüset Ilse Johanna Christiansen forwüset for e Frasche Rådj. Jü wörd iinstimi kiised.
- E 16. moi häi üusen ålereklub san uurs-ütfluch eeftert dånsh. Et gäng tu e praliine-manufaktuur "Fruens Vilje Chokolade" bai Huuger/Højer.
- Foon e 24. bit 26. moi wjarn en ra lasmoot foon e Foriining ma tut interfriisk draåwen aw Hållilönj, organisiird foon e Frasche Rådj.
- Tut 90-iiri feriiinsjubiläum foon e Friisk Foriining wörd di 2. juuni aw „Fraschlönj" en fiirstün oufhülen. Di formoon köö knååp 100 geeste begrööte. E fästfordreeging wörd foon Thomas Steensen hülen (eefter-tuleesen önj Nordfriesland 183), än Marie Tångeberg än Jörgen Jensen Hahn fer-teelden üt jare tid as formoon/forwüset.

- E 7. juuni hääwe we en madelåler-kontsert ma "Wortsatia" önj e Naiblinger Christusschörk stiped; Frisia Historica häi inlååsid.
- Sü as arks iir wus uk jarling wi en floose foon fraschschoulere foont dånsh schölj önj Bräist unerweegens aw en tra deege lung fiiljtuur (10. bit 12. juuni) foon Bräist eefter Oowentoft. Organisiird wörd e räis foon e fraschliirerin Christiane Bodenhagen, än bai e tuur ma deerbai wjarn uk da biise önjstalde foon e Friisk Foriining.
- Bai e FUEV-kongræs foon e 19. bit 23. juuni önj Brixen wus e Foriining ma Bahne Bahnsen än Jörgen Jensen Hahn fertrin.
- Foon e 5. bit 7. juuli häi Frisia Historica tut treed grut madelåler-waagiinje eefter Naibel bai e wåile inlååsid. Önj di tuhuupe-hång heet e Friisk Foriining dan uk wi en gibselturniir oufhülen.
- Ark ouder iir büt e Friisk Foriining en jöögedspråkeräis tu en ouder manerhäid önj Europa önj. Foon e 24. juuli bi tu e 1. august gäng et nü ap eefter e Fåröer. Heer stååten da 16 junge manschne sügoor aw ræste foon en frasch toorp, wat Akraberg håtj än weer önjt madelåler 13 frasche familiie boogeden.
- Üusen samerütfluch gäng jarling e. 31. august ma en bus tut eefterbaged Nydam-büütj, wat bai e strönj foon Sottrupskov läit, än awåädrie eefter Sønderborg tut sloot.
- Üusen kulturkonsulånt Gary Funck as sunt e 18. septåmber nü uk formoon foon e kulturütschus Sønderjylland-Schleswig. Hi wus awfoorie ål formoon foon e kulturütschus foon e kris Nordfraslönj wörden.
- E Friisk Foriining heet döör en projåkt tuhuupe ma e kris deerfor sörid, dåt deer 15 twåårspråde haanewisschilde bai bundesstroote än da wichtiste loonstoote apstald wörden, wat da manschen begrööte, wan ja e gråns tu Nordfraslönj pasiire.
- E Frasche Feriin for e Ååstermååre än e Friisk Foriining häin e 27. septåmber lååsid tu en oufschiisfiir for di schotische språke-moon Dr. Alastair Walker foont Nordfriisk Uurdebök-ståå bai e Uni Kil. E fästredee hül Marie Tångeberg.
- 28. septåmber: Frisia Historica lååsid in tu en harfstnoopemårket än en weedstrid önj boogeschitjen.